

1298

*Nec multo
post circa
Helleston-
um victi.*

pontum cum hoste congressæ, nihilo meliore eventu, quam ad Corcyram eo anno pugnatum erat, confligere: & ut non meliore eventu, ita non minori animo dimicatum. Ferunt ingenti prælio pugnatum: ac post multam stragem Venetorum fortunam inclinasse, sexdecim longas naves cum remigum turmis sociisque navalibus in hostium potestatem venisse: quæ reliquæ fuerunt, media trepidatione dilapsas, celeri fuga e Ligurum conspectu abiisse. Fuit recentior hæc clades omnino Corcyrensi illa minor: quia paucioribus navibus esset concursum. Sed ut in affecto corpore, in quo omnis nova morbi accessio gravissima est: ita hic novus luctus, qui modico intervallo majorem illum consecutus est, incredibili mœrore Venetos affecit. Et ne publica fortuna uspiam meliore spe esset, haud multo post quam ita in Hellesponto est pugnatum, victor Ligur in Cretam cursum tenuit: ubi primo impetu Cydonem urbem occupavit. Sed in tantis malis haud quidem Venetus ille vigor aliquo modo remisit: reparatisque sæpe viribus, vario est eventu cum hoste deinceps bellatum; sed quo loco, quove tempore, quibus auspiciis, neque scriptores quos sequimur, neque annales ipsi id tradunt: ita ut merito suspicari possis, præter hæc, quæ vulgo tradita sunt, nil reliquo belli tempore accidisse memoria dignum. Illud affirmant omnes, post mutuas clades citro ultroque illatas, jam viribus utriusque populi gravissimo bello exhaustis, hinc inde animos ad pacem, magis videlicet necessariam quam voluntariam, inclinasse. Positis namque armis, odia nunquam deposuere. Quamdiu secundo sit cum Ligure bellatum, auctores quos vidimus non tradunt: sed multa sunt quibus conjectare libet, Ligusticum id bellum secundum brevius primo pene dimidio fuisse; verum quo brevius, eo sane atrocius. Quo accidit, ut uterque populus ultro ad pacem, ut diximus, inclinaverit, non quia nollent amplius in armis esse, sed quia plus non poterant.

1299

*Pax cum
Genuensibus.*

Fessam duro Rempublicam & adhuc præ nimio labore anhelantem, periculossimæ civium conjurationes exceperunt: sed illæ ipsæ, ut diversis hominum ordinibus profectæ, ita magnitudine periculi inæquales; nam quo minoris fortunæ

hæc